

17.25 CUNTRASTS SIN SRF 1

La chanzun rumantscha – tranter tradiziun ed innovaziun

Il «Festival da la chanzun rumantscha» a Zuoz fa d'ina vart omagi al stgazi prezios da chanzuns rumantschas existentas. Ma igl è er la finamira da dar spazi a tuns



novs, contemporans e da mussar uschia che la chanzun rumantscha n'è betg museala, mabain frestga e vitala. Dumengia proxima ha lieu a Zuoz la segunda ediziun dal «Festival da la chanzun rumantscha» che ha già sia premiera avant trais onns a Trun. En il center da quests trais dis stat la chanzun rumantscha en tut sia diversidad da furmas e dievers. I sa preschantan chors d'uffants, chors maschadads, chors virils, trubadurs, chantauturas e chantauturs sco er in ensemble vocal. E chantà vegni dapertut, en baselgia, sin tribuna, sin plazzas e vias, durant lavuratoris e cun star da compagnia. Il punct culminant dal festival è dentant la concorrenza da cumposiziun la dumengia suentermezdi. Là stattan ils novs tuns en il center. 52 novas chanzuns èn vegnidas inoltradas. 12 da quellas ha ina giuria da musicistas e musicists professionals premià e tschernì per il final, quatter chanzuns per mintga categoria: chor d'uffants, chor maschadà e chor viril. Questas chanzuns vegnan preschentadas per l'emprima giada al public e lez tscherna a la fin per mintga categoria la chanzun per il premi dal public.